

Ritz Carlton: Un proyecto beneficioso pa Aruba, sostenibel y duradero

STA. CRUZ—Minister di Salubridad, drs. Booshi Wever ta elabora riba e proyecto di Hotel Ritz Carlton. Durante un tratamiento den Parlamento di e proyecto di Hotel Ritz Carlton, diahuebs dia prome di December, tres punto di preocupacion a bin padilanti pa loke ta trata e Ministerio: Medio Ambiente, Fondonan Social, 3. Fluho di Stranhero

Ad.1. Medio Ambiente:

Den e carta cu Gobierno a manda pa e representantenan di Hotel Ritz Carlton nos a exige di nan, cu nan mester traha un estudio riba cierto aspectonan di nos medio ambiente y despues cu nos a haya compromiso for di nan cu nan lo adresa e puntonan ey. Despues di a pasa riba e rapport traha door di e experto prof. Joe Edminston, di parti di mi ministerio nos a manda un carta pa mas splicacion riba cierto aspectonan y atrobe nos a haya un compromiso di Ritz Carlton, cu nan lo adresa tur nos preocupacionan y pa nos, pa loke ta trata nos medio ambiente e proyecto aki por sigui. Tabata tin duda di parti di oposicion riba e expertisio di prof. Edminston, mescos cu tabata tin den pasado, tempo di e proyecto di Tierra del Sol. E tempo ey a manda busca Prof. Spaans

pa hunto cu prof. Edminston traha e M.E.R. pa Tierra del Sol. Y aki ningun cambio a bin padilanti, di loke prof. Edminston a traha prome. Mi kier a remarca cu e preocupacion di nos flora y fauna pa e proyecto di Tiera del Sol tabata innecesario, particularmente si nos mira con awe tin hopi mas vegetacion cu antes y p.e. e cantidad di shoco a cuadruplica. E situacion actual na unda e Hotel Ritz Carlton lo ser construi, ta den un hopi mal estado, na unda autonan ta corre pa subi y baha botonan, ta ser usa pa parkeer auto, te hasta e mangrovenan ta ser kibra pa parkeer auto, pues ya caba nos beachnan ta dañá. Nos kier pa e keda asina ey? Door cu autonan aki ta corre riba e beachnan, esakinan ta pak e santo blanco, haci e beach duro, consecuentemente ora cu e tortuga subi, e ta bay back, pasobra e beach ta mucho duro y e ta bay busca otro caminda pa traha su neishi pa pone webo. P.e. nan ta bay banda di e Hotelnan chikito. Pues e hecho cu tin un hotel no ta stroba ponemento di webo door di e tortuganan. Un otro asunto cu mester tene cuenta cune ta e hecho cu mester tin un sombra pa e tortuga pone webo. Door cu ta kap y kita e mangrovenan pa corre y parkeer auto awor, e sombra

aki tambe ta desaparece, consecuentemente, e tortuga ta move bay otro sitio. Si no haci nada, a lo largo ningun tortuga lo bin mas, ni pa subi e beach, corda pa pone webo. Den un UNEP-rapport di 1993, a ser haci mencion di varios (6) recomendacion cu mester tene cuenta pa no stroba e tortuganan di traha un neishi y pone webo. Y Ritz-Carlton lo bay haci tur loke ta poni den e raport aki pa garantiza cu e tortuganan lo por traha nan neishi y pone nan webo. ATROBE, door di p.e. prohibi autonan corre riba beach (beach lo no ta duro mas) lo planta mangrove atrobe (pa e sombra), e beachnan lo ser haci y teni limpi, lo pone glasnan special pa e claridad di luz no bay lama. Pues door esaki nos no mester tin miedo pa nos medio ambiente. Nos proximo generacionnan por ta sigur cu nan por sigui goza di nos beachnan limpi y awor nan lo ta safe tambe.

Ad.2 Nos fondonan social

Manera ya ta conoci nos fondonan di SVB, esta AOV-AWW y ZV-OV, ya caba no tin deficit. E problemanan cu tabata pone e fondonan aki na peliger ta esnan cu no tabata paga loke nan mester a paga na e fondonan aki. Pero e gobierno aki a pone e dunadoman di trabao paga

loke nan mester paga. Y esaki Sr. Mike Eman ta un di nan cu no tabata paga. Tambe e problema di vergrijzing ta un problema. Y cu binimento di algun personanan di afor, pa un corto tempo, ta drecha cu esaki por drecha e situacion di e fondo.

Ad.3 Fluho di stranhero

Ta hustamente e preocupacion e.o. di nos fondonan social nos a bin cu algun cambio den e maneho di admision di stranhero. Pa cuminsa e punto di salida ta e.o. cu tur permiso ta temporal y e necesidad riba mercado laboral ta determinante. Manera nos sa, tin anualmente un fluho di hobennan cu ta caba school, ta pesey ningun permiso ta ser prolonga despues di 3x cu esaki a ser prolonga caba. Consecuentemente cu cada año lo evalua si ta prolonga e permiso, dependiendo di e mercado laboral y despues di 3x biaha mester bin cu un otro inmigrante den su lugar, pa esun ey no crea derecho, cu eventualmente por stroba un yiu di tera haya trabao. Esaki AVP kier a aboli si nan a drenta den gobierno. Cu esaki nos ta garantiza cu nos fondo di AOV/AWW ta sigui ser aporta na dje substancialmente, loke cu no ta e caso si no crea cuponan di trabao. Aki un paar di año

si sigui cu e maneho estricto aki, nos lo tin solamente yiuinan di tera ta traha, no solamente den e Hotel Ritz-Carlton aki, pero tur caminda.

Pa garantiza cu nos fondo di AZV no haya mucho presion, esun cu kier bin na remarca pa haña un permiso mester demostra cu e ta bon di salud. Esaki kiemen cu no solamente e mester demostra cu e no tin un malesa contagioso, pero cu e no tin ningun defecto fisico p.e. dor di un accidente ni tampoco un malesa cronico. Mirando e hecho cu e inmigrantenan aki lo ta personanan hoben y nan ta bin pa traha, e presion riba AZV lo ta minimo.

Teniendo na cuenta cu loke mi a trece padilanti, mi ta di e firme conviccion cu e bienestar general di Aruba y nos poblacion ta grandemente sirbi cu e proyecto grandi aki. Finalmente mi kier haci mencion di opcion y e garantia cu a ser duna na 1988 door di AVP (lesa Mike Eman como consehero) a ser duna sin tene cuenta cu nos medio ambiente, sin tene cuenta cu nos fondonan social y sin tene cuenta cu e fluho di inmigrante! E gobierno aki si a tene cuenta cu cada un di e aspectonan aki y cu esaki nos ta logra e balance cu ta necesario pa un desaroyo sostenibel y duradero.